

բաժնորում Գեղարդի վիմափորի քանդակը, դժվար է պնդել, բայց անշուշտ խմատ ունի այս խմբակցությունը:

Ինչ վոր ասացինք Պոռոյան այս քանդակի մաս կազմող կենդանիների և թռչունի համար՝ յեղան գլուխը, շղթայված առյուծներն իրար դեմ, արծիվը մագրիների մեջ խոյով կամ գույգ պարիկները, նույնը կարող ենք ասել և մնացածների համար, ինչպես վիմափոր տաճարի քոչն է, վորի թևավոր որինակն ունինք Յեղվարդի Ս. Յակոբի հյուսիսային լուսամուտի գլխին, իսկ ավելի վաղ սասանյան արծաթի գործերի (պատկ. 77) մեջ\*, Թանատի վանքի հարավային պատի աղավունին պատող ըաղին, հար և նման Աղթամարին, յեղան

գլուխը, զույգ սիրամարդները կաթուղիկի թմբուկի վերայ\*: Այսպես են և յերկրաչափական, հիւսկեն քանդակները, վարդյակները\*\*, արմավենիկները, սրածայր կամարներով պատհաններն իրենց զարդերով Պոռոյան ժամատան մեջ (պատկ. 78)<sup>1</sup>, կրկնված նման փոփոխակներով նաև մահմեդական ժամանակակից արվեստի մեջ, խաչքանդակների զարդերը, վոմանք միայն ավելի հին ամանները պահած, ինչպես վիմափոր գավթի գեղանկար խաչը (պտ. 43, 44, 49, 34.): Սրանք բոլորը մեզ համար հասկանալի յեն իբրև ԺԳ. դարու հայ արվեստին հատուկ մոտիվներ, կամ իբրև մաս ընդհանուր հոսանքի:

Ը

Ե Ա Չ Ի (1299—1317)

Սմիր Հասանի և Թաճիրի վորդին եր Եաչին կամ Եաչին, վորի գործունեության նկարագրության անցնելուց առաջ, հարկավոր է պարզել մի խնդիր, վոր մեր բանասերներին շփոթության մեջ է ձգել: Ջալալյան (Բ. 148) և Քաջբեկունի (Ար. 1890. 339) Եաչի անունով մի իշխան են ընդունում, վորպես Պոռոյի կամ Պապաքի վորդի, վոր սխալ է. աղբյուրների ուսումնասիրությունը պարզում է, վոր Եաչի անունով մի իշխան է միայն յեղել այս ժամանակ և նա Պոռոյի թոռն է, Սմիր-Հասանի վորդին: Այս սխալի պատճառն այն է, վոր Եաչին մի քանի արձանագրությունների մեջ յիշված է Պոռոյի վորդիների շարքում. դոցանից հնագույնը Թանատի վանքի 1273 թվի արձանագրությունն է (Հավիլված. Ա. 18.). «յարիական և քաջատոհմ իշխանության Պաուշայ և որդւոցն Պապաքին, Հասանայ, մանկանն էաչոյ շինեցաւ սուրբ եկեղեցիս». յերկրորդ անգամ հիշվում է Մարտիրոս գլուղի վիմափոր յեկեղեցու Մատթեոս վարդապետի արձանագրության մեջ 1286 թվին (Հավիլ. Ա. 23, պատկ. 56). այստեղ, ի հարկե, բոլորովին պարզ է, վոր Եաչին Հասանի վորդին է՝ «Եւ ի տրութի իշխանաց իշխանին Պոռոյ և որ/(դոց նոր)ին Պապաքին եւ Հասանա եւ որ/(դոյ) նորին էաչո և մաւր նորին/ Թ(աճ)երոյն . . .»՝ բայց Ջալալյան սխալ է կարգացել, (Բ. 201), ուստի և չէ պարզվել նորա համար խնդիրը: Յերրորդ ան-

գամ Պապաքի և Հասանի հետ հիշված է Եաչին Թանահատի մի յերկրորդ՝ Սուլթու բեկի՝ արձանագրության մեջ (եջ. 141. Հավիլ. Ա. 18բ.), ինչպես պարզել ենք 1284 թվից՝ Պոռոյի մահվանից հետո գրված: Վերջապես չորրորդ անգամ հիշված է Արկաղու Ս. Սաչի մի թերի արձանագրության մեջ, վոր բերում է Ջալալյան<sup>2</sup>. «Եւ ամենավե՛ իշխանի Պոռոյ եկեղեցիս և մանկան էաչոյ և մեծահաւատ տիկնոջ Սոտանայ, յորժամ տէր էր տեղւոջս»:

Չունենայինք ուրիշ աղբյուրներ, քան այս արձանագրությունները, այն էլ մեր նախորդների սխալ ընթերցումներով, արդարև ուրիշ յեղրակացություն Եաչիի մասին դժվար էր հանել. սակայն, տեսանք, վոր այդ արձանագրություններից մեկը՝ Մատթեոս վարդապետինը, պարզ և մեկին կերպով հայտնում է, թե Եաչին Հասանի և Թաճիրի վորդին է. նույնը հաստատում են Եաչիի յերկու արձանագրությունները, մեկը յուր շինել տված Սոտակերաց Ս. Նշանի պահարանի հետևում (պատկ. 79)<sup>3</sup>, մյուսը Սպիտակավոր Աստվածածնի հյուսիսային պատի վերա ներսից (պատկ. 80). նույնը տեսանք պարզ հաստատված Թաճիրի (եջ. 147—153) և Շմավոն գրչի Ոճոփի վանքում 1292 թ. գրված հիշատակաբանների մեջ: Բացի դորանից, Որբելյան, վոր ժամանակակից է, քանիցս խոսում է Եաչի իշխանի մասին, վոր յուր փեսան էր, Ելիկում Որբել-

\* Смирнов. Восточное Серебро. պատկ. 88. Սասանյան վոսկերչական գործերից մեր ցուցադրած պատկերները 65, 76, 77. առնված են Լենինգրադի Երմիտաժի սասանյան ժողովածուներից, լուսանկարները հոդապել է ինձ համար ներկա վարիչ պրոֆ. Հովսեփ Որբելին, վորին և հայտնում ենք սրտանց շնորհակալություն: Անիի հյուսիսային պարսպի վազող առյուծը խաչով առնված է Անիի շարքից, վոր հրատարակված է ակադեմիկ Մառի կողմից կամ նրա խմբագրությամբ:

\* Bachman. Tafel. 34.  
\*\* Համ. Strzygowski. Altai—Iran պատկ 138.  
1 Սրա նկարագրությունը տես էջ 114. մեզնից անկախ պատճառով պատկերը յուր տեղում դնել չկարողացանք տպագրության ժամանակ:  
2 Բ. 134  
3 Տես և Գեղարվեստ № 4. Գրչութեան Արուեստը Գ. § 24, Տախտ. ԺԳ: